



Broj: 01-139/25
Vareš, 29.05. 2025. godine

Na osnovu člana 8. Zakona o principima lokalne samouprave u FBiH („Službene novine Federacije BiH“, broj: 49/06 i 51/09), člana 12. Zakona o vodama Zeničko-dobojskog kantona („Službene novine Zeničko-dobojskog kantona“, broj: 17/07) i člana 22. Statuta Općine Vareš-prečišćeni tekst 01-162/12 od 11.09.2012.godine, Općinsko vijeće na sjednici 7. održanoj dana 29.05. 2025.godine, d o n o s i:

ODLUKU

o mjesnim vodovodima na području općine Vareš

I- OPĆE ODREDBE

Član 1.

Ovom odlukom propisuje se način izgradnje mjesnih vodovoda, javnih bunara i javnih česmi, njihovo upravljanje i korištenje, zaštita i održavanje na području općine Vareš.

Član 2.

Vodni objekti za iskorištavanje voda koji služe za vodosnabdjevanje (izuzev za opću upotrebu voda) brane i akumulacije, vodozahvati, bunari, kapitaže s odgovarajućom opremom, postrojenja za prečišćavanje vode za piće, rezervoari i cjevovodi i drugi pripadajući objekti, javne česme i javni bunari što su ih za svoje potrebe izgradila pravna ili fizička lica u njihovom su vlasništvu i ona brinu o upravljanju tim objektima.

Član 3.

Vodni objekti koji služe za vodosnabdjevanje vodom za piće izvan općinskih sjedišta su mjesni vodovodi, javne česme i javni bunari.

Član 4.

Svakome je dozvoljeno koristiti vodu običnim načinom koji ne zahtjeva posebne naprave i ne isključuje druge od jednakog korištenja vode (opća upotreba vode).

Opća upotreba vode obuhvata naročito:

- (1) Zahvatanje vode bez posebnih naprava iz vodotoka i jezera za osnovne potrebe jednog domaćinstva.
- (2) Zahvatanje podzemne vode (bunar na vlastitom zemljištu) ili vode sa izvora na vlastitom zemljištu, koja se koristi za osnovne potrebe jednog domaćinstva.
- (3) Prikupljanje i korištenje oborinskih voda za osnovne potrebe jednog domaćinstva, koje se skupljaju na vlastitom zemljištu.
- (4) Rekreaciju na vodama.

Osnovnim potrebama domaćinstva smatra se korištenje vode za piće, održavanje čistoće i slične potrebe u domaćinstvu. Takvim korištenjem ne smatra se korištenje vode za navodnjavanje, te korištenje vode u tehnološkom procesu pri obavljanju privredne djelatnosti.

Član 5.

- (1) Mjesnim vodovodom u smislu ove odluke smatra se vodni objekat koji služi za snabdijevanje vodom za piće jednog ili više seoskih naselja izvan gradskog sjedišta, koji ima zaštićeno izvoriste, kaptažu, rezervoar, razvodnu mrežu i ostale objekte.
- (2) Javnim bunarom u smislu ove odluke smatra se vodni objekat sa odgovarajućom zaštitnom zonom i odgovarajućim uređajima koji služe za snabdijevanje vodom za piće najmanje dva domaćinstva u seoskom naselju.
- (3) Javnom česmom u smislu ove odluke smatra se vodni objekat sa odgovarajućom zaštitnom zonom i odgovarajućim uređajima koji služe za snabdijevanje vodom za piće stanovnika i prolaznika, a može biti izgrađena i van naselja.
- (4) Infrastruktura mjesnog vodovoda obuhvata sljedeće vodne objekte: vodozahvatni objekti, kaptaže, bunari, pumpne stanice, potisni cjevovodi, rezervoari, dovodni cjevodovodi, razvodna mreža sa zasuknim oknima.
- (5) Unutrašnjim instalacijama- smatraju se sve instalacije od vodomjera do posljednje izlivne jedinice, a u slučajevima gdje nije ugrađen vodomjer- od mjesta priključka na vodovodnu mrežu.
- (6) Korisnik vode (u daljem tekstu: Korisnik) je svaka fizička ili pravna osoba koja je s Upravnim odborom ili Odborom za vodu sklopila Ugovor o isporuci vode, kao i svaka fizička ili pravna osoba koja koristi nekretninu priključenu na mjesni vodovod, bilo da svoje pravo korištenja nekretnine temelji na valjanoj pravnoj osnovi (najmoprimac, podnajmoprimac, stanar, zakupac, podzakupac), bilo da se bez valjane pravne osnove koristi nekretninom. Korisnik je, u kontekstu Zakona o zaštiti potrošača, izjednačen sa potrošačem.
- (7) Građevinski odbor za izgradnju vodovoda je organ od najmanje tri člana kojeg imenuju sva lica koja učestvuju u izgradnji vodovoda, većinom glasova.
- (8) Odbor za upravljanje i održavanje vodovodom je organ kome vlasnici vodovoda nakon izgradnje povjeravaju poslove upravljanja i održavanja vodovoda.

Član 6.

- (1) Izvorišta voda koja se zahvataju radi snabdijevanja vodom za piće stanovništva putem mjesnih vodovoda moraju imati dovoljne količine zdravstveno ispravne vode za piće, kako bi se su svako doba godine moglo obezbjediti neprekidno snabdijevanje vodom stanovništva.
- (2) Kapacitet rezervoara mjesnog vodovoda treba da obezbjedi dovoljnu količinu vode za dnevnu potrošnju korisnika i rezervu za gašenje požara.
- (3) Izuzetno nadležni organ će investitoru izdati potrebne vodne saglasnosti i kad izvorišta nemaju dovoljne količine vode, ukoliko on na drugi način ne može riješiti snabdijevanje vodom.
- (4) Ukoliko je dovoljan kapacitet izvorišta, a profil cijevi ne dozvoljava mogućnost novih priključaka, finansiranje izmjena postojećeg profila cijevi vrši se po odluci Odbora građana iz prikupljenih sredstava održavanja.
- (5) Kaptaža i rezervoari koji su, u smislu ovog zakona, sastavni dio mjesnog vodovoda, a koji služe za prihvatanje i akumuliranje vode za piće, moraju imati propisane izolacije i ostale potrebne uređaje.

II- IZGRADNJA MJESNIH VODOVODA I JAVNIH ČESMI

Član 7.

- (1) Investitor za izgradnju mjesnog vodovoda može biti Općina Vareš, mjesna zajednica, grupa građana ili građanin.
- (2) Investitor izgradnje javne česme može biti mjesna zajednica, grupa građana ili građanin, a odluku o izgradnji javne česme donosi mjesna zajednica.
- (3) Ako je investitor grupa građana ili građanin, izgradnja javne česme se vrši uz suglasnost mjesne zajednice, koja je dužna da obezbijedi njeno održavanje.

Član 8.

- (1) Vodovodi koji su izgrađeni iz sredstava općine/grada, kantona, federacije i drugih institucija u dijelu više od $\frac{1}{2}$ uložених sredstava, uključujući troškove za naknadna proširenja i rekonstrukcije mogu se predati na upravljanje komunalnom preduzeću, uz suglasnost nadležne općinske Službe za poslove vodoprivrede.
- (2) Uložena vlastita sredstva korisnika, komunalno preduzeće će kompenzirati isporukom vode bez naplate za period koji će pokrivati troškove vlastitih ulaganja građana.
- (3) Zahtjev za rekonstrukciju mjesnih vodovoda, mogu podnijeti samo oni vodovodi koji imaju vodnu dozvolu.

Član 9.

- (1) Investitor je dužan izabrati Građevinski odbor za izgradnju vodovoda (u daljem tekstu: Građevinski odbor), a imenovanje istog potvrđuje mjesna zajednica.
- (2) Aktom o imenovanju Građevinskog odbora određuje se predsjednik i zamjenik, koji su po funkciji zajednički predstavnici investitora i ovlašteni su za zaključivanje i potpisivanje svih akata čije donošenje je obavezno u postupku izgradnje vodovoda (angažovanje stručnih firmi za provjeru lokaliteta izvorišta, pribavljanje vodnih akata, akata iz oblasti prostornog uređenja i građenja, rješavanje imovinsko-pravnih odnosa pribavljanjem saglasnosti vlasnika svih parcela preko kojih vodovod prolazi i svih ostalih akata i saglasnosti).
- (3) Aktom iz prethodnog stava utvrđuje se mandat, prava i obaveze Građevinskog odbora u skladu sa ovom odlukom, s tim da mandat predsjednika i članova Građevinskog odbora može trajati najduže dvije godine uz mogućnost ponovnog imenovanja.
- (4) Prava i obaveze Građevinskog odbora traju do okončanja radova na izgradnji vodovoda, odnosno do imenovanja Odbora za upravljanje i održavanje vodovoda.

Član 10.

Prava i dužnosti Građevinskog odbora za vodu su:

- pribavljanje svih zakonom propisanih akata potrebnih za izgradnju i rekonstrukciju,
- organizovanje potpisivanje Ugovora koji u ime domaćinstva korisnika potpisuje nosilac domaćinstva,
- vođenje evidencije o učešću o izgradnji svakog pojedinca, prikupljenim ili utrošenim novčanim sredstvima i drugim podacima koji su važni za izgradnju i kasnije korištenje objekta,
- donošenje odluke o cijeni priključka na novi vodovod na osnovu raspoložive dokumentacije o ulaganjima korisnika vodovoda za izgradnju mjesnog vodovoda,
- da nakon završetka radova podnese pismeni izvještaj Savjetu mjesne zajednice,
- da odredi cijenu vode isporučene iz mjesnog vodovoda.

Član 11.

- (1) Izgradnja i rekonstrukcija mjesnog vodovoda vrši se na način i pod uslovima određenim u izdatoj vodnoj saglasnosti.
- (2) Vodna saglasnost izdaje se pod uslovima propisanim zakonom i podzakonskim aktima a izdaje općinska služba nadležna za poslove iz oblasti voda.

Član 12.

- (1) Po izvršenoj izgradnji ili rekonstrukciji mjesnog vodovoda, a prije izdavanja odobrenja za upotrebu po propisima o prostornom uređenju, odnosno građenju, pribavlja se vodna dozvola.
- (2) Uz zahtjev za izdavanje vodne dozvole za mjesni vodovod, za koji su investitori grupa građana, podnosi se i pismeni ugovor iz člana 5. stav (6) ove odluke.
- (3) U slučaju da do donošenja ove odluke ne postoji Odbor za vodovod, predsjednik Savjeta mjesne zajednice je dužan da u roku od 30 dana isti uspostavi.
- (4) Ukoliko korisnik ne želi potpisati pismeni ugovor smatra da je odustao od prava na vodovod, te se takvom korisniku voda može isključiti.

Član 13.

- (1) Rekonstrukcija vodovoda vrši se na način i po postupku predviđenom za izgradnju vodovoda.
- (2) Zahtjev za rekonstrukciju vodovoda mogu podnijeti samo oni vodovodi koji imaju vodnu dozvolu.

III- KORIŠTENJE, UPRAVLJANJE I ODRŽAVANJE VODOVODA, JAVNE ČESME I JAVNOG BUNARA

Član 14.

- (1) Voda se mora koristiti racionalno i ekonomično. Svaki korisnik vode je dužan koristiti se vodom na način i u obimu kojim se voda čuva od rasipanja i štetnih promjena njenih osobina i omogućuje zakonsko pravo korištenja vode drugim licima.
- (2) Građani koji su vodovod izgradili vlastitim sredstvima dužni su da trajno obezbjeđuju potrebna finansijska sredstva i druge uslove za održavanje i funkcionisanje tih objekata u skladu sa njihovom prirodom i namjenom, i za vršenje minimalnog broja propisanih pregleda zdravstvene ispravnosti vode za piće iz tih objekata.

Član 15.

- (1) Izvorišta voda koja se zahvataju radi snabdijevanja vodom za piće stanovništva putem vodovoda moraju imati dovoljne količine zdravstveno ispravne vode za piće, kako bi se u svako doba godine moglo obezbjediti neprekidno snabdijevanje vodom stanovništva.
- (2) Kapacitet rezervoara vodovoda treba da obezbjedi dovoljnu količinu vode za dnevnu potrošnju korisnika i rezervu za gašenje požara.
- (3) Izuzetno nadležni organ će investitoru izdati potrebne vodne saglasnosti i kad izvorišta nemaju dovoljne količine vode, ukoliko on ne može na drugi način riješiti snabdijevanje vodom.
- (4) Ukoliko je dovoljan kapacitet izvorišta, a profil cijevi ne dozvoljava mogućnost novih priključaka, finansiranje izmjena postojećeg profila cijevi vrši se po odluci Odbora za održavanje i upravljanje vodovodom iz prikupljenih sredstava održavanja.

- (5) Kaptaža i rezervoari koji su, u smislu zakona i ove odluke, sastavni dio vodovoda, a koji služe za prihvatanje i akumuliranje vode za piće moraju imati propisane izolacije i ostale uređaje i opremu za popravku kvalitete vode (bistrenje, dezinfekcija i slično), ukoliko se u zavisnosti od izvršene analize vode pojavi potreba za korištenje istih. Opremom i uređajima za popravku kvalitete vode trebaju rukovati stručna lica sa kojima korisnici vodovoda sklapaju poseban ugovor.

Član 16.

- (1) U periodu hidrološkog minimuma (sušni period) za mjesne vodovode koji nemaju dovoljnu količinu vode, Odbor za upravljanje i održavanje vodovoda donosi odluku o uvođenju redukcije vode.
- (2) U periodu primjene odluke o uvođenju redukcije vode zabranjena je upotreba vode iz mjesnog vodovoda za sve druge potrebe osim za piće i sanitarne potrebe.
- (3) Maksimalna dnevna potrošnja vode u tom periodu po članu domaćinstva je 100 litara.
- (4) U periodu ekstremne suše dnevna potrošnja vode po članu domaćinstva može biti i manja, što utvrđuje svojom odlukom Odbor za upravljanje i održavanje vodovoda.

Član 17.

- (1) Licima koja nisu učestvovala u izgradnji mjesnog vodovoda, može se odobriti priključak na vodovod, ukoliko vodovod obzirom na količinu vode na izvoristu, može zadovoljiti povećan broj korisnika i ako se njihovo snabdijevanje vodom za piće ne može obezbijediti na drugi ekonomičan i racionalan način.
- (2) Lice koje je vodnom saglasnošću odobreno priključenje na mjesni vodovod, dužno je prije priključenja, odnosno korištenja vode, putem ugovora sa vlasnicima mjesnog vodovoda regulisati plaćanje srazmjernog dijela troškova izgradnje vodovoda i srazmjernog dijela troškova održavanja i iskorištavanja vodovoda, a u slučaju ne zaključenja ugovora spor rješava nadležni sud.
- (3) Potpisivanjem ugovora iz prethodnog stava korisnik stiče pravo suvlasnika vodovoda.
- (4) Srazmjerni dio troškova se utvrđuje na osnovu relevantne dokumentacije za predmetni vodovod i određuje uz suglasnost nadležne službe za poslove vodoprivrede.
- (5) Cijena priključka ne smije biti veća od cijene priključka na gradski vodovod.
- (6) U izuzetnim slučajevima uz dostavljanje dokaza o visini troškova, cijena se može utvrditi u većem iznosu samo uz suglasnost nadležne Službe za poslove vodoprivrede.

Član 18.

- (1) Vlasnici/korisnici vodovoda dužni su da plaćaju naknadu za utrošenu vodu.
- (2) Naknada za vodu isporučenu iz vodovoda ne može biti određena ispod iznosa koji osigurava pokrivanje nužnih troškova za održavanje i funkcionisanje objekata u skladu sa njihovom prirodnom namjenom i za vršenje minimalnog broja propisanih pregleda zdravstvene ispravnosti vode za piće iz tih objekata.
- (3) Odluku o načinu na koji se određuje nadoknada i visini naknade za utrošenu vodu donosi Odbor za upravljanje i održavanje vodovodom.
- (4) Upravljanje i održavanje vodovoda je u nadležnosti Odbora za upravljanje i održavanje.
- (5) Odbor za upravljanje i održavanje vodovoda se formira ukoliko se sa jednog vodnog objekta snabdijeva minimalno deset domaćinstava.

Član 19.

- (1) Aktom o imenovanju Odbora za upravljanje i održavanje vodovoda određuje se predsjednik i zamjenik i oni su ovlaštena lica za potpisivanje akata i zaključivanje ugovora čije donošenje je neophodno u funkciji upravljanja i održavanja vodovoda.
- (2) Upravljanje vodovodom podrazumijeva odlučivanje o svim pitanjima koja se tiču vodovoda, a naročito o:
 - priključivanju pravnih i fizičkih lica građana koji nisu učestvovali u izgradnji na izgrađeni vodovod,
 - visini naknade za priključak na vodovod,
 - visina naknade za utrošenu vodu,
 - održavanje vodovoda od vodozahvata do vodomjernog šahta,
 - kontroli namjenskog i racionalnog korištenja vode iz vodovoda,
 - vođenje evidencije o svim korisnicima vodovoda, naplati sredstava za utrošenu vodu, o mjerama i radnjama za održavanje vodovoda,
 - drugim pitanjima od značaja za funkcionisanje vodovoda.
- (3) Održavanje vodovoda podrazumijeva:
 - održavanje i popunjavanje rezervnih dijelova u potrebnoj količini,
 - popravak pojedinih dijelova ili objekata,
 - redovni pregled ili remont pojedinih dijelova ili objekata,
 - zaštitu vodovoda od zagađivanja,
 - održavanje vodomjera,
 - obezbjeđenje higijenske ispravnosti vode,
 - održavanje zona sanitarne zaštite izvorišta.

Član 20.

- (1) Mjesni vodovodi mogu se uz suglasnost njihovih korisnika predati na upravljanje komunalnom preduzeću.
- (2) Zahtjev iz prethodnog stava se podnosi putem općinske službe nadležne za poslove iz oblasti voda.
- (3) Cijene vode vodovoda koji su predati na upravljanje komunalnom preduzeću predlaže komunalno preduzeće, a usvaja Općinsko vijeće Općine Vareš.

Član 21.

- (1) Upravljanje i održavanje javne česme i javnog bunara čiji su investitori grupe građana ili građanin je u nadležnosti mjesne zajednice koja je dala suglasnost za izgradnju istih.
- (2) Izgradnja, korištenje, upravljanje i održavanje javne česme i javnog bunara vrši se u skladu sa ovom odlukom.

IV- ZAŠTITA IZVORIŠTA VODOVODA, JAVNE ČESME I JAVNOG BUNARA

Član 22.

- (1) Zaštita izvorišta mjesnih vodovoda vrši se uspostavljanjem i održavanjem zona sanitarne zaštite u skladu sa odredbama Zakona o vodama („Službene novine Zeničko-dobojskog kantona“, broj:17/07) i Pravilnika o načinu određivanja uvjeta za određivanje zona sanitarne zaštite i zaštitnih mjera za izvorišta vode za javno vodosnabdijevanje stanovništva („Službene novine Federacije BiH“, broj: 88/12).

Član 23.

- (1) Do donošenja odluke za zaštitu izvorišta, u skladu sa važećim propisima iz oblasti voda, uspostavlja se privremena zaštita svih izvorišta u radijusu od 50 (pedeset) metara od postojećeg vodozahvata.
- (2) Odbor za upravljanje i održavanje vodovoda obavezan je uspostaviti privremenu zaštitnu zonu najkasnije u roku od 6 (šest) mjeseci od dana na stupanja na snagu ove odluke.
- (3) Na području I zaštitne zone izvorišta, zabranjene su sve aktivnosti koje nisu u direktnoj vezi sa normalnim radom i održavanjem vodozahvatnih objekata.
- (4) Aktivnosti koje se provode u cilju normalnog rada i održavanja vodozahvatnih objekata ne smiju štetno djelovati na izvorište.
- (5) Objekte koji pored vodozahvata imaju izgrađene i rezervoare potrebno je zaštititi postavljanjem ograde (bodiljkava žica) u prečniku od 10 metara sa betonskim stubovima minimalne visine 2 metra i sa 12 redova žice.
- (6) Prečnik postavljanja ograde se može u izuzetnim slučajevima i smanjiti uz suglasnost općinske službe nadležne za oblast voda.

Član 24.

- (1) Zabranjeno je neovlaštenim licima otvaranje i zatvaranje armatura, instalacija, hidranata i ostalih uređaja vodovoda, izuzev u slučajevima kada je to nužno u cilju sprečavanja šteta većih razmjera.

V - SANITARNO-HIGIJENSKE MJERE

Član 25.

- (1) Pravno lice ili mjesna zajednica kome je povjereno upravljanje mjesnim vodovodima odgovara za pravilnu primjenu svih propisa i sanitarno-tehničkih mjera kojima se dostiže propisani kvalitet vode iz vodovoda.
- (2) Ukoliko je dnevna količina zahvaćene vode iz vodovoda od 10 do 100 m³, pregled zdravstvene ispravnosti vode za piće vrši se minimalno jednom godišnje.
- (3) Ukoliko je dnevna količina zahvaćene vode iz vodovoda veća od 100 m³, pregled zdravstvene ispravnosti vode za piće vrši se minimalno četiri puta godišnje.
- (4) Može se koristiti broj stanovnika u zoni snabdijevanja umjesto količine vode, da bi se odredio minimum učestalosti kontrole praćenja, pod pretpostavkom da je potrošnja vode 200 litara dnevno po stanovniku.
- (5) Pregled zdravstvene ispravnosti vode za piće može vršiti samo ovlašteno pravno lice.
- (6) Kopija nalaza od zdravstvene ispravnosti vode za piće dostavlja se općinskom sanitarnom inspektoru, najkasnije u roku od 7 (sedam) dana od dana prijema nalaza.
- (7) Odbor za održavanje i upravljanje vodovodom, dužan je postupiti prema naloženim mjerama sanitarnog inspektora o poduzimanju mjera za zdravstvenu ispravnost vode za piće.

VI-EVIDENCIJA O MJESNIM VODOVODIMA; JAVNIM BUNARIMA I JAVNIM ČESMAMA

Član 26.

- (1) Nadležna općinska služba dužna je da ustroji u roku od 90 dana od dana stupanja na snagu ove Odluke evidenciju o mjesnim vodovodima, javnim bunarima i javnim česmama, kao i da tu evidenciju trajno vodi, te da blagovremeno registruje sve

promjene vezane za izvorišta koja se koriste za opću upotrebu, mjesne vodovode, javne bunare i javne česme.

Član 27.

Evidencija iz prethodnog člana naročito sadrži podatke o:

- (1) Nazivu i mjestu izvora te broju domaćinstava koja koriste navedeni izvor a podliježe pod pojam „voda za opću upotrebu“,
- (2) Nazivu mjesnog vodovoda ili javnog bunara-naselju, odnosno mjesnoj zajednici,
- (3) Broju i datumu izdavanja vodne suglasnosti,
- (4) Broju i datumu izdavanja odobrenja za građenje,
- (5) Broju i datumu izdavanja vodne dozvole,
- (6) Broju i datumu izdavanja upotrebne dozvole,
- (7) Broju domaćinstava koja koriste mjesni vodovod, odnosno javni bunar-broju naknadno priključenih domaćinstava na mjesni vodovod, odnosno javni bunar.

VII- MJERE ZA PROVOĐENJE OVE ODLUKE

Član 28.

- (1) Inspekcijski nadzor nad sprovođenjem odredaba ove Odluke vrši općinska sanitarna inspekcija i vodna inspekcija.
- (2) Inspektori u izvršavanju poslova inspekcijskog nadzora poduzimaju upravne radnje u skladu sa Zakonom o inspekcijama Zeničko-dobojskog kantona, Zakona o vodama Zeničko-dobojskog kantona i ovom odlukom.

VIII- KAZNENE ODREDBE

Član 29.

Novčanom kaznom u iznosu od 1.000,00 KM do 5.000,00 KM bit će kažnjen za prekršaj predsjednik i članovi Građevinskog odbora ako:

- ne provede proceduru i ne pribavi sve zakonom propisane akte potrebne za izgradnju, odnosno rekonstrukciju vodovoda-član 10. ove odluke.
- ne organizuje potpisivanje ugovora iz člana 10. ove odluke.
- ne vodi blagovremenu evidenciju o učešću u izgradnji svakog pojedinca, prikupljenim i utrošenim novčanim sredstvima i drugim pitanjima bitnim za izgradnju i kasnije korištenje objekta-član 10. ove odluke.
- nakon završetka radova ne podnese pismeni izvještaj investitoru koji ga je izabrao i svu raspoloživu dokumentaciju ne preda Odboru za upravljanje i održavanje-član 10. ove odluke.
- ne obavlja ostale poslove koji su mu dati u nadležnost ovom odlukom i aktom o imenovanju-član 9. i 10. ove odluke.
- ne postupi po rješenju inspektora.

Član 30.

Novčanom kaznom u iznosu od 1.000,00 KM do 5.000,00 KM bit će kažnjen za prekršaj predsjednik i članovi Odbora za upravljanje i održavanje vodovoda ako:

- vodovod ne održava u funkcionalnom stanju i ne koristi u skladu sa njegovom prirodom i namjenom-član 18. ove odluke.
- ne donese odluku o načinu na koji se određuje naknada i visini naknade za utrošenu vodu, uz suglasnost općinske službe nadležne za oblast voda-član 18. ove odluke.

- izvještaj o prikupljenim sredstvima ne podnese vlasnicima/korisnicima vodovoda i nadležnoj općinskoj službi- član 16.ove odluke u periodu hidrološkog minimuma ne donese odluku o uvođenju redukcije-član 14.ove odluke.
- ne uspostavi privremenu zaštitnu zonu u propisanom roku-član 19. ove odluke.
- ako ne osigura stalni i sistemski pristup pregleda vode i ne poduzima mjere za osiguranje zdravstvene ispravnosti vode-član 19.ove odluke.
- ne dostavlja sanitarnom inspektoru dokaze o analizi vode-član 25. ove odluke.
- ne postupi po rješenju inspektora.

Član 31.

Novčanom kaznom u iznosu od 200,00 KM do 1.000,00 KM kazniti će se za prekršaj odgovorno lice u mjesnoj zajednici ako ne obezbjedi održavanje javne česme i javnog bunara, čiji je investitor grupa građana ili građanin, a koji su izgrađeni uz suglasnost mjesne zajednice-član 21. ove odluke.

Član 32.

Novčanom kaznom u iznosu od 100,00 KM do 1.000,00 KM biti će kažnjen za prekršaj fizičko i pravno lice-korisnik vode, kao i drugo fizičko i pravno lice ako:

- licu kojem je vodnom dozvolom odobren priključak na vodovod i korištenje vode sa tog vodovoda ometa priključenje na vodovod ili mu ometa snabdijevanje vodom iz vodovoda-član 17. ove odluke.
- ne plaća ili ne plaća u propisanom roku naknadu za utrošenu vodu-član 18. ove odluke.
- vodu koristi neracionalno i neekonomično-član 16. ove odluke.
- u periodu smanjenja ili nestašice vode, vodu ne koristi u skladu sa odlukom o ograničenom korištenju vode, odnosno korištenju vode isključivo za određene potrebe-član 16. ove odluke.
- neovlašteno crpi otvaranje i zatvaranje armature, instalacija, hidranata i ostalih uređaja vodovoda, izuzev kad je to nužno u cilju sprečavanja šteta većih razmjera- član 24. ove odluke.
- oštetiti instalacije i objekat javne česme i javnog bunara- član 21. ove odluke.
- ne postupa u skladu ili postupa suprotno ostalim odredbama ove odluke.
- ne postupi po rješenju inspektora.

IX- PRELAZNE I ZAVRŠNE ODREDBE

Član 33.

- (1) Za mjesne zajednice u čijem su vlasništvu vodni objekti sa kojih se snabdijeva minimalno deset domaćinstava i više, a u kojima nije imenovan Odbor za upravljanje i održavanje vodovoda Savjet Mjesne zajednice je dužan imenovati isti u roku od mjesec dana od dana stupanja na snagu ove odluke.
- (2) Domaćinstva koja koriste vodu za opću upotrebu ne podliježu odredbama odluke koje se vežu za vodne objekte koji su u vlasništvu mjesne zajednice ili Odbora za vodu.
- (3) Voda za opću upotrebu koja se koristi kao voda za piće-voda namijenjena za ljudsku upotrebu po kvalitetu mora odgovarati parametrima zdravstvene ispravnosti vode za piće.

Član 34.

- (1) Ova Odluka stupa na snagu osmog dana od dana objavljivanja na oglasnoj tabli Općine Vareš.



**PREDSJEDAVAJUĆI
OPĆINSKOG VIJEĆA**

Malik Rizvanović
Malik Rizvanović

Odluka objavljena na oglasnoj tabli Općine Vareš 30.05. 2025.godine.



OPĆINSKI NAČELNIK

Zdravko Marošević
Zdravko Marošević